



## СТРАТЕГИЯЛЫҚ СЕРІКТЕСТІК НЫҒАЯ БЕРМЕК

Мемлекет басшысы Еуропа Одағының Орталық Азия жөніндегі арнаулы өкілі Тери Хакаланы қабылдады. Бұл туралы Ақорданың баспасөз қызметі хабарлады.

Мемлекет басшысы Қазақстанның Еуропа Одағымен арадағы стратегиялық серіктестікті одан әрі нығайтуға баса мән беретінін атап өтті.

Қасым-Жомарт Тоқаев Еуропалық кеңестің президенті Шарль Мишельге 10 қаңтардағы бейнебайланыс режимінде өткен кездесу барысында елімізді қолдап сөйлегені және ынтымақтастықты нығайтуға нық сенім білдіргені үшін ризашылығын айтып, сәлемін жолдады.

Қасым-Жомарт Тоқаев Тери Хакаланың өтініші бойынша «қасиретті қаңтар» оқиғасы жөнінде айтып берді. Сондай-ақ Бас про-

кратураға болған оқиғаға қатысты тергеу жұмыстарын ашық әрі әділ жүргізу жөнінде тапсырма берілгенін мәлімдеді. Мемлекет басшысы адам құқықтары мен бостандығының сақталуы еліміздегі барлық билік тармағы үшін басымдық саналатынына назар аударды.

Қазақстан Президенті саяси жүйені одан әрі жаңғыртуға және әлеуметтік теңсіздікті сәйкестендіруге, ұлттық экономиканы әртарапандыруға бағытталған Жаңа экономикалық бағдарды іске асыру жоспары жөнінде мәлімет берді.

Қасым-Жомарт Тоқаев Еуропа одағымен ынтымақтастық-

тын барлық бағыты бойынша тығыз байланыстарды дамытуға және бұған дейін қол жеткізілген уағдаластықтарды толыққанды жүзеге асыруға ниетті екенін нақтылады.

Өз кезегінде Тери Хакала Брюссельдің Қазақстанмен арадағы байланыстарды дамытуға мүдделі екенін жеткізді. Еуропалық дипломат Президентке мазмұнды әрі пайдалы пікір алмасқаны үшін алғыс білдірді. Сондай-ақ Еуропа Одағы Президенттің саяси реформаларын толық қолдайтынын және еліміздің өркендеуіне, тұрақтылығына мүдделі екенін айтты.

## Президент наурыз айында Үндеу жариялайды

Президент Қасым-Жомарт Тоқаев 11 қаңтар күні өткен Мәжіліс отырысында азаматтық қоғаммен және сарапшылармен арадағы диалог негізінде саяси реформалардың жаңа топтамасы әзірленеді деп мәлімдеген болатын.

Осыған байланысты Мемлекет басшысы наурыз айының ортасында халыққа Үндеу жариялауды жоспарлап отыр. Бұл үндеуде реформалардың негізгі бағыттары мен қоғамды саяси трансформациялауға бағытталған аса маңызды шаралар айқындалады. Бұл туралы Президенттің баспасөз хатшысы Берік Уәли Facebook парақшасында жазды.

## Үкіметтің кеңейтілген отырысы өтеді

Бүгін 8 ақпанда Мемлекет басшысының төрағалығымен Үкіметтің кеңейтілген отырысы өтеді. Бұл туралы Президенттің баспасөз хатшысы Берік Уәли Facebook парақшасында жазды. Жиын барысында еліміздің былтырғы әлеуметтік-экономикалық дамуының қорытындылары туралы есеп беріледі және Үкіметтің 2022 жылға арналған іс-қимыл жоспары қарастырылады.

## Көңіл айту жеделхатын жолдады

Мемлекет басшысы аса көрнекті қаламгер, Қазақстанның Еңбек Ері, Халық жазушысы, Ұлы Отан соғысының ардагері Әбдіжәміл Нұрпейісовтің дүниеден өтуіне байланысты марқұмның жақындары мен туыстарына көңіл айту жеделхатын жолдады.

Қасым-Жомарт Тоқаев жеделхатта Әбдіжәміл Кәрімұлының сұрапыл соғысты бастан кешкенін, елге оралған соң қазақ әдебиетін өркендетуге сүбелі үлес қосқанын атап өтті.

— Ұзақ жылғы шығармашылық қызметі жемісті болды. «Қан мен тер» трилогиясы, «Соңғы парыз» дилогиясы сияқты туындылары сыншылар мен оқырмандар тарапынан жоғары бағасын алды. Заман жүгін көтерген романдары әлемнің көптеген тіліне аударылды. Әбдіжәміл Кәрімұлының жаңа белесті бағындырған қазақ әдебиетін шетелге танытуға сіңірген еңбегі орасан зор. Өмір бойы қолынан қаламы түскен жоқ. Қазақ елінің рухани-мәдени саласын дамыту жолында өлшеусіз қызмет атқарды. Өнегелі ғұмыр кешіп, сонына әдеби мол мұра қалдырған Әбдіжәміл Кәрімұлының жарқын бейнесі ұмытылмайды. Халқымыз есімін әрдайым ардақ тұтады.

Марқұмның иманы саламат, жаны жәннатта болсын, — делінген Президенттің жеделхатында.

## Жүргізуші куәлігі сатыла ма?

Қазақстанда жүргізуші куәлігін сатып алу тоқтауы керек. «Азаматтарға арналған үкімет» мемлекеттік корпорациясының басқарма төрағасы Әділ Қожықов былтыр осылай уәде еткен. Жауаптылар жыл сайын курсанттарға қойылатын талапты күшейтіп, емтихан тапсыруды қиындата түсті. Бірақ бұл жүргізуші куәлігінің сатылуына тоқтам болудың орнына, сол «бармақ басты, көз қысты» «Қызметтің» қымбаттауына себеп болып отыр. Ал егер емтиханды жеңілдетсек ше? Онда жүргізуші куәлігі көрінгенің қолында кетуі мүмкін. Бірақ қазіргі жағдай одан да қауіпті. Автомектелке бармаған, қарапайым ережелерден бейхабар жандар да ақшасын беріп, куәлікке әп-сәтте қол жеткізіп жатқан жоқ па?



### 1 САҒАТТА ЖАСАП БЕРЕДІ

Жүргізуші куәлігінің бағасы әр қалада әртүрлі. 2 Гис қосымшасында мамандандырылған Халыққа қызмет көрсету орталығы жайлы деректерді іздеп отырып, орталыққа жазылған пікірлерді көзіміз шалды. Емтихан тапсыра алмағандар мен сәтті тапсырып шыққандар ой-пікірлерін бөлісіпті. Арасында «көмек

керек болса, жазыңыз» деп әлеуметтік желідегі парақшаларын жазып қалдырғандар да табылды. Бір-екеуіне қоңырау шалып, «көлік жүргізуші куәлігін қалай алсам болады?» деген сұраққа төмендегідей жауап алдық.

«Астанада 200-250 мың теңгенің шамасында. Қазір қымбаттаған. 2019 жылы әкеме 80 мың теңгеге жасап берген. Астанада

алу қиын, Алматыда 150 мың теңгеге жасатуға болады. Бірақ басқа қалада тұрсаң, Алматыға 1 аптаға келу керек. Тестке кірсең, өздері өткізіп жібереді. Тест тапсырғаныңды растау үшін камераға түссен болды» деген елордалық Жазира өзінің сенімді танысы барын айтып сендірді.

(Жалғасы 5-бетте)

## Президент Асхат Ораловты қабылдады

Қасым-Жомарт Тоқаев «Nur Otan» партиясының Атқарушы хатшысы Асхат Ораловты қабылдады. Кездесу барысында Президент «Nur Otan» партиясын жаңғырту жұмыстарын жеделдетуді тапсырды.

Партия Төрағасының айтуынша, ел азаматтарының талап-тілектеріне толық жауап беруі үшін партияны жүйелі түрде қайта құру қажет. Сондай-ақ партия заманауи сын-қатерлерге төтеп беруге және жедел әрекет етуге тиіс.

Мемлекет басшысына партияның жұмысын

қайта құру жоспары жөнінде мәлімет берілді. Асхат Ораловтың айтуынша, саяси ұйымның Орталық аппараты Мәжілістегі фракциямен бірлесіп отырып, партияның сайлауалды бағдарламасында қамтылған Жол карталарының жүзеге асырылуы бойынша жүйелі талдау жүргізіліп жатқанын баяндады.

## Олигархтардан қанша миллиард өндіріледі?



Экономикалық қауіпсіздікті нығайту мәселесі көкейкесті болып тұр. Қазақстанның сыртқы қарызы артуда. Бюджеттің бүйірі ортайды. Ел болашақ ұрпақ үшін сақталуға тиіс Ұлттық қорды қарқынды шығындап жатыр. Парадокс жағдай қалыптасты: әлемде соңғы жылдары шикізат бағасы күрт өскен, ал одан ел қазынасына түсетін салық өспеген. Себебі экономиканың әр саласын астына басқан олигополия аз салық төлейді.

3 >>

## Технарға зәру бұл қоғам

Заман өзгерген сайын адамның сұранысы да құбылып отырады. Сол секілді мамандықтар да өзгеріп жатыр. Бірі жойылып, енді бірі жаңадан пайда болды. Мәселен, индустриялық бағдарламаны жүзеге асыра бастаған тұста елімізде инженерлер ең құрметті мамандық саналған. Қаржы дағдарысына дейін мұндайдың бағасы жоғары болған кезде мұнай-газ саласы мен жалпы экономикаға, бизнеске бет бұрғандар көбейді. Енді индустриялық-инновациялық бағдарламалар жайлаған тұста технологияның тілін меңгергендерге зәру болды. Бірақ бұл саладағы білікті мамандарымыз көп пе, жастарды қай бағытта оқытқан жөн?

4 >>



## Қызылжарлықтар жылуға мұқтаж

Солтүстік Қазақстан облысының орталығы – Петропавл қаласын жылумен қамтамасыз ететін №2 жылу-электр орталығының құрал-жабдығы қаусап тұр. Соның салдарынан соңғы екі жыл бойы кәсіпорын апаттан көз ашпай отыр. Әсіресе, биылғы қыс басталғалы қызылжарлықтар дірдеп отыруға мәжбүр. Жылыту маусымы басталғалы 3-4 рет апат салдарынан қала жылусыз, ыстық суусыз және жарықсыз қалды. Тіпті, әлеуметтік нысандар да дұрыс жылытылмайды.

7 >>





## Отырыстың күн тәртібі бекіді

Сенат Спикері Мәулен Әшімбаевтың төрағалығымен Палата бюросының отырысы өтті. Онда 2022 жылдың 10 ақпанында өтетін Сенат отырысының күн тәртібі бекітілді.

Соған сәйкес, алдағы отырыста Сенат депутаты Ләззат Қалтаеваның ант беруі және оны Сенаттың тұрақты комитетінің құрамына сайлау туралы мәселелер қаралады.

Сонымен қатар Сенат отырысында депутаттар «Қазақстан Республикасының Үкіметі мен Америка

Құрама Штаттарының Үкіметі арасындағы халықаралық салық тәртібін жетілдіру туралы келісімді ратификациялау туралы» заң жобасын қарайды. Бұл құжат аталған екі ел үкіметтерінің автоматты ақпарат алмасу үшін тиімді инфрақұрылымды пайдалана отырып, салық салу мәселелерінде өзара жәрдемдесуі арқылы халықаралық салық тәртібін жетілдіруді көздейді.

Сондай-ақ бюро отырысында Мәжілістен келіп түскен заң жобалары жұмыс үшін Сенаттың тұрақты комитеттеріне бөлініп берілді.

А. СҰЛТАН

## Қазақстан қалалары тым ластанған



Қалалардың ластануы бойынша ең нашар елдер рейтингінде Қазақстан 115 елдің ішінде 33-орынға шықты. Ал қоршаған ортаны қорғауға бағытталған инвестициялар бір жылда бар-жоғы 4 пайызға өскен. Eneurgrom.kz мониторинг агенттігі ұсынған дерекке сенсек, Қазақстанда ластану индексі – 73,4. Индекс неғұрлым үлкен болған сайын, жағдай соғұрлым нашар болады.

Ластанған елдер қатарына Камерун, Моңғолия және Мьянма кірген. Финляндияда ластану индексі 12,1, бұл – әлемдегі ең жақсы көрсеткіш. Рейтингке қатысатын ТМД елдерінің ішінде Қазақстанға қарағанда Әзербайжанда ғана жағдай нашар. Ал

Молдова, Украина, Ресей, Армения және Беларусь те көрсеткіш бізге қарағанда жақсы.

Быттырғы қорытынды бойынша, қоршаған ортаны қорғауға бағытталған күрделі инвестициялар 4,3 пайызға, яғни 163,9 миллиард тенгеге дейін өскен. Өңірлік бөліністе сектордағы күрделі инвестициялардың ең көп көлемі Жамбыл облысына бөлінген (52,8 миллиард тенге). Көшбасшы өңірлер үштігіне Нұр-Сұлтан (26 миллиард тенге, жылына 7 есе өскен) және Ақтөбе облысы (19,8 миллиард тенге, 2 есе өскен) кірді. Top-5 өңірге Атырау және Шығыс Қазақстан облысы енген. Ең сорақысы, Солтүстік Қазақстан облысында быттыр бұл салаға мүлде инвестиция құйылмаған екен.

М.ЖАЛҒАСҰЛЫ

## L-Capital ісіне нүкте қойылды

300 адамның 260 миллион теңгесін жымқырған L-Capital компаниясына қатысты қылмыстық іс тергеліп бітті. ҚР ІІМ Тергеу департаментінің басшысы Санжар Әділовтің мәліметінше, істі полиция қызметкерлері мен арнайы прокурорлар қызметі бірлесіп қараған.

Осылайша, салымшыларды бағалы қағаздарға инвестиция құюға шақырған компанияның әрекетіне толықтай құқықтық баға берілген.

Айта кету керек, өткен жылы Алматы полициясы L-Capital компаниясынан зардап шеккен

салымшыларға жүгінген еді. Ресми мәлімет бойынша, елімізде 30 мыңнан астам адам

қаржы пирамидасының құрбаны болған.

Ш.КҮЗЕКБАЙ



## Білім беруде ТМД елдерінің соңында қалдық

US News & World Report нұсқасы бойынша білім беру саласындағы үздік елдер рейтингінде Қазақстан 78 ел ішінде 71-орында тұр. Бұл тұста Ranking.kz сарапшылары білім беру саласындағы жұмыспен қамту деңгейін және мұғалімдердің жалақыларын салыстырып, талдау жасаған.

Рейтинг көшбасшылары АҚШ, Ұлыбритания мен Германия болды, Гватемала – ең соңғы орында. Рейтингке қатысатын ТМД елдері ішінде Қазақстан тек Әзербайжаннан оған. Ресей, Украина, Беларусь және Әзербайжан алдымызға түсті.

2021 жылдың төртінші тоқсанында білім беру саласы қызметкерлерінің орташа жалақысы 219,2 мың тенге болғанын білеміз. Негізі, Қазақстанда орташа айлық 275,6 мың тенгеге жетті, яғни білім беру саласына қарағанда 25,7 пайызға артық. Сектордағы ең жоғары жалақыны жоғары оқу



орны қызметкерлері (299 мың тенге), ең төмен жалақыны мектепке дейінгі білім беру мекемелерінің қызметкерлері (112,6 мың тенге) алады екен.

Өңірлер бойынша ең көп жалақы алатын елордадағы қызметкерлер – 344,5 мың тенге. Үштікке Алматы қаласы (265,4 мың тенге) мен Алматы облысы (247,4 мың тенге) кірді. Батыс

Қазақстан облысында білім беру саласы қызметкерлерінің жалақысы аз, 181,7 мың тенге алады.

Салада 1,1 миллион адам жұмыс істейді. Жұмыспен қамтылғандардың көпшілігі Түркістан облысында – 142,9 мың адам. Ең азы Солтүстік Қазақстан облысында тіркелді – 35,2 мың адам.

М.ХАҚНАЗАР



## Екі өңірде браконьерлер ұсталды

Шығыс Қазақстан облысының 3 ауданында браконьерлікпен айналысқан бірнеше топ қолға түсті. Олардан мылтық және тегіс ұңғылы қару тәркіленген.

Әуелі Бесқарағай ауданында 4 ер адам ұсталды. Олардың көлігінен еліктің төрт ұшасы, екі мылтық, пышак, оқ-дәрі табылған. Бұдан соң тәртіп сақшылары Тарбағатай ауданында мылтықпен жабайы қабан атқан 53 жастағы тұрғынды, Бородулиха ауданында елік атқан екі адамды қолға түсірді. Олардан да заттай айғақтар мен қару-жарақ шыққан. Шығыс Қазақстан облысының Полиция департаменті күдіктілерге қатысты сотқа дейінгі тергеуді бастады.

Қарағанды облысында да браконьерлік өршіп тұр. Таяуда полициялар Қызыл кітапқа енген жануардың 844 мүйізін тапқан. 5 ақпанда Жанаарқа кентінде жүргізілген жедел іс-шаралар кезінде 29 жастағы азаматтың автокөлігінен 844 дана мүйіз тәркіленген. Автокөліктің жүргізушісі уақытша ұстау изоляторына қамалды. Қазір жүргізушінің тағы екі сыбайласы ұсталған. Облыстық Полиция

департаментінің бастығы Ерлан Файзуллиннің айтуынша, аталған факті бойынша Қылмыстық кодекстің 339-1-бабына сәйкес «Сирек кездесетін және құрып кету қаупі төнген, сондай-ақ пайдалануға тыйым салынған түрлерімен, олардың бөліктерімен немесе дериваттарымен заңсыз айналысуы» бойынша қылмыстық іс қозғалып жатыр. Аталған баптың санкциясына байланысты қылмыскердің мүлкін тәркілеп, үш жылдан бес жылға дейін бас бостандығынан айыру көзделген.

Быттыр да дәл осы Жанаарқа ауданында киік мүйізін сатумен айналысқан тұрақты топ ұсталып, 274 дана мүйіз тәркіленген болатын. Сот шешімімен олардың бірі 4,5 жылға қамалып, қалған үшеуі 3,5 жылға шартты түрде бас бостандығынан айырылды.

М.ТӨЛЕУ

## Санда да, санатта да жоқ



Білім және ғылым министрлігі жүргізген тексеру кезінде университеттерде сабаққа бармастан студент ретінде тіркелген 10 мыңға жуық азамат анықталып, олар оқудан шығарылды. Бір қызығы, жоғары оқу орнында олардың құжаттары болмаған. Бұл туралы министр Ахсат Аймағамбетов мәлім етті.

Ведомство басшысының мәліметінше, өткен жылы білім сапасы төмен 15 жоғары оқу орны жұмысын тоқтатқан. Сондай-ақ білім беру сапасы нашар 65 университет пен 30 колледждің лицензиялары кері қайтарылды. 100 мыңнан астам студент басқа жоғары оқу орнына ауыстырылды.

Ш.АТЫХАНҰЛЫ











